

PAVLVTIVS ANAFESTVS

D U X I.

*Electus Anno 697. obiit Ann. 717. cum regnasset Annos 20
Menses sex. Dies 8.*

S C H E M A V E T V S.

Heracleotes rex Venetos, statui Rempublicam, Luitprandum Conciliavi.



Vrbem Venetam cum à principio habuissent Leges, non Reges: post Annos ducentos & quinquaginta ad præsidium suæ libertatis, voluere Ducem, exauctoratis Tribunis, qui minùs vigiles obdormiebant adversùs piratas. Quantum fuerit Reipublicæ corpus? ex tribus ferè sæculis, quibus elaboratum, metire, priusquàm caput acciperet. Anno itaque Urbis conditæ 276. primus omnium, Ducis titulo insignitur Paulutius Anafestus in natali Heracleæ solo; qui post præstitum iuramentum promovendi jure Rempub: protinùs voto potiùs officii, quàm libidine Imperii, coactis ad validam classem infulis, quæ irruptiones retunderet Barbarorum, ostia fluminum præmunivit, armavit litora,